

Morning Regional Dogri News Bulletin

06 Oct. 2025. 09.20 Hrs

Headlines

- उपराज्यपाल मनोज सिन्हा होरें आखेआ ऐ जे जम्मू-कश्मीर गी शांतिपूर्ण बनाने लेई पिच्छले 5एं बरें च बड़े बड़्डे जोगदान दिते गे न।
- बिहार दे गवर्नर आरिफ मोहम्मद खान होरें आखेआ ऐ जे कश्मीर, भारत दे सिरै दा ताज ऐ ते एह ज्ञान ते बुद्धिमता धरती ऐ।
- जल शक्ति मंत्री जावेद राणा होरें बन्ने आहले जिले रजौरी च तरक्कियाती कम्में ते पानी सप्लाई योजनाएं च हासल प्रगति दी समीक्षा कीती।
- भारती रेलवे जम्मू थमां श्रीनगर लेई सिद्दी रेल सेवा शुरू करने दी योजना बना'रदा ऐ। संचालन ते परतियै विकास आहले कम्में गी नवम्बर म्हीने दे अखीरै तगर तोढ़ चाढ़ी दित्ता जाहग।
- मौसम विभाग ने आखेआ ऐ जे जम्मू-कश्मीर च अज्जै थमां लेइयै औंदी 16 नवम्बर तगर मौसम खुशक बने दे रौहने दे असार न।

<><><><><><>

LG- JK Peace (Byte)

उपराज्यपाल मनोज सिन्हा होरें कल आखेया ऐ जे जम्मू-कश्मीर गी रमानदार-उन्नत ते खुशहाल बनाने लेई पिच्छले 5एं बरे दौरान केंई बड़्डे जतन ते बलिदान दिते गेन ते समाज दे हर वर्ग दे हर इक व्यक्ति दा एह फर्ज बनदा ऐ जे ओ उ'नें ताकतें खलाफ इक- जुट होइयै

खड़ोई जान- जेहड़ियां इत्थू दी रमानदारी च खलल पाना चाहंदियां न। “जम्मू-कश्मीर च रमानदारी, लोक ते संभावना” विषय पर आयोजित इक भारतीय विचारगोष्ठी च अपने विचार रखदे होई एल.जी होरें जम्मू-कश्मीर दे नमें नजरिए बारे बी गल्ल कीती जेहड़ा रमानदारी-खुशहाली-निडरता ते इक-जुटता पर आधारित ऐ ते जेहदे च हर इक नागरिक सशक्त ऐ ते भारत दी प्रगति कोला प्रभावत ऐ। उनें आखेया.

<><><><><><>

LG- Book Release (Byte)

उपराज्यपाल मनोज सिन्हा होरें कल राजभवन जम्मू च पदमश्री डाक्टर जितेन्द्र उधमपुरी हुंदियां-ऊर्दू शायरी दिएं दंऊ कताबें दा विमोचन कीता- जिंदे च इक ऐ- “धूप -छांव” ते दुई में “तनहाई में सोचना हूँ”। डाक्टर जितेन्द्र उधमपुरी हिंदी-ऊर्दू-डोगरी-पंजाबी ते अंग्रेजी भाषा च बी लिखदे न ते अपने लेखन दे विशेष अंदाज लेई बड़े लोकप्रिय न। एल.जी होरें डाक्टर उधमपुरी हुंदी- साहित्य दे क्षेत्र च उन्दे योगदान लेई सराहना कीती ते भविक्ख लेई शुभकामनां दितियां। अपनी कताबें बारे आकाशवाणी समाचार कन्नै गल्ल करदे होई डाक्टर जितेन्द्र उधमपुरी होरें आखेया.

<><><><><><>

Bihar Guv-Kmr Crown (Byte)

बिहार दे गवर्नर आरिफ मोहम्मद खान होरें कल आखेया जे कश्मीर- भारत दे सिरै दा ताज ऐ ते आदिकाल थमां ज्ञान ते बुद्धिमता दा केन्द्र रेहा ऐ। श्रीनगर दे शेर-ए-कश्मीर अंतराष्ट्रीय

कांफ्रेंस सेंटर च इक कार्यक्रम च शिरकत करने दे बाद मीडिया कन्ने गल्ल करदे होई खान होरें आखेया जे उन्दे दिलै च कश्मीर इक चेची थाहर रखदा ऐ। उनें आखेया जे एह गल्ल मै कुसै गी खुश करने लेई जा रस्मी तौरा पर नैई आक्खा करदा- मै सच्चें इस गल्लै कन्ने मुत्तफिक हां- ते वाकई इस गल्लै गी मन्नना जे कश्मीर स्हाड़े मुल्खै दे सिरै दा ताज ऐ ते एहदे च कुसै चाल्ली दे शक दी कोई गुंजैश नैई। आरिफ मोहम्मद खान होरें अग्गे आखेया जे स्हाड़ी संस्कृति च पढ़ाई पूरी करिये डिग्री हासल करने कोला पैहले विद्यार्थिये गी प्रतीकात्मक तौरा पर कश्मीर बक्खी किश कदम टुरने लेई आखेया जंदा ऐ.

<><><><><><>

Rana Devp. Review

जल शक्ति मंत्री जावेद राणा होरें राजौरी जिले च जारी विकास कम्में ते चेचा करिये पानी सप्लाई स्कीमें दी प्रगति- रफ्तार ते उपलब्धिये दी व्यापक समीक्षा करने लेई कल इक बैठक दी अध्यक्षता कीती। बैठक दौरान राणा होरें जल जीवन मिशन-केपैक्स बजट ते नाबार्ड दी मदद कन्ने तोड़ चाढ़ी जार'दिये परियोजनाएं दे कम्मै च तेजी आहन्ने पर जोर दिता। उ'नें आखेया जे इनें परियोजनाएं तैहत जारी हर इक कम्मै गी मित्थे गेदे समें दे अंदर-अंदर मुकम्मल करना यकीनी बनाया जा- तां जे “हर घर जल” आहली पैहल तैहत हर इक घरै तगर नकले राएं पानी आहला साफ पानी जकीनी तौरा पर पुज्जी सके। मंत्री होरें इनें कम्में लेई जारी सारे पैहे दा स्हेई-स्हेई ते पूरा इस्तमाल करने पर जोर दिता तां जे समे अवधि मुक्कने पर कोई बी पैहा विजन खर्चे दे वापस नैई भेजना पवै।

<><><><><><>

Babbar Valley (Byte)

बॉलीवुड दे वरिष्ठ अदाकार ते सियासतदान राज बब्बर होरें आखेआ ऐ जे उ'नें कदें बी कश्मीर घाटी च अपने आपै गी असुरक्षित मैहसूस नेई कीता ऐ। कश्मीर गी हिरख-प्रेम, शांति ते निग्ग दी धरती करार दिंदे होई उ'नें आखेआ जे घाटी ने उ'दी फिल्मी करियर गी इक नमीं दिशा देने च बड़ी महत्वै आहली भूमिका निभाई दी ऐ। मशहूर सैलानी थाहर गुलमर्ग दे अपने दौरें दरान पत्रकारें कन्नै गल्ल करदे होई राज बब्बर होरें आखेआ जे उ'दी फिल्मी जातरा च कश्मीर दी भूमिका बड़ी महत्वपूर्ण रेई दी ऐ ते उंदिएं केई फिल्में दी शूटिंग कश्मीर च कीती गेई ही। राज बब्बर होरें कश्मीर दे लोकें दी परौहनाचारी दी सराहना करदे होई आखेआ जे उ'नें सदा गै कश्मीर गी बड़ा सुरक्षित मैहसूस कीता ऐ। उ'नें आखेआ.

<><><><><><>

Jammu- Srinagar Rail

जम्मू-कश्मीर च रेल-सम्पर्क दे क्षेत्रे च हासल उपलब्धियें च होर मता बाद्दा दर्ज करने दे मकसद कन्नै उत्तरी रेलवे नै जम्मू डिविजन च विकास कारवाइयें ते पुर्नविकास दे कम्में च मती तेजी आंदी ऐ, तां जे जम्मू ते श्रीनगर बश्कार सिद्दा रेल सम्पर्क बनी सकै। आकाशवाणी दे जम्मू संवाददाता नै जानकारी दिती ऐ जे ओ रेल गड्डियां जेहड़ियां एल्लै छड़ा कटड़ा ते श्रीनगर बश्कार चलै कर'दियां न, ओ हून तौले गै जम्मू रेलवे स्टेशन थमां चलना शुरु होई जाहगंन। रेलवे दे इक सीनियर अफसर नै जानकारी दिती ऐ कि श्रीनगर ते जम्मू बश्कार सिद्दा रेल-सम्पर्क जकीनी बनाने लेई सोच-विचार चलै करदा ऐ। एहदे लेई जम्मू स्टेशन पर पटरी बछाने सरबंधि कम्म लगभग पूरा होई चुके दा ऐ जिसलै कि बाकी सार्वजनिक ढांचा

जियां कि नमें प्लेटफार्म ते स्टेशन पर होर दुइयां सुविधा बी लगभग मुकम्मल होने दे कोलकाल न।

<><><><><><>

Yogasana Sports (2 Bytes)

“माई यूथ- माई प्राइड” अभियान दे बैनर हेठ श्रीनगर दे पोलो ग्राउंड आहले इन्डोर स्पोर्ट्स हॉल च कल्लै थमां 6मीं जम्मू-कश्मीर योगास्न स्पोर्ट्स चैंपियनशिप शुरु होई जेहदे च सब-जूनियर, जूनियर ते सीनियर स्तर दे खड्दारी हिस्सा लैरदे न। जम्मू-कश्मीर दे योगास्न स्पोर्ट्स एसोसिएशन आसेआ आयोजित एह् प्रतियोगिता औंदी 7 नवम्बर गी संपन्न होग। इस प्रतियोगिता दे दरान महाराष्ट्र च होने आहली राश्ट्री स्तर दी प्रतियोगिता च जम्मू-कश्मीर दी नुमाइंदगी करने आहले जागतें ते कुड़िएं दी सब-जूनियर श्रेणी लेई ट्राॅयल बी आयोजित कीते जाडन। इस सरबंथै च होर जानकारी दिंदे होई इक सरबंथत अधिकारी ने दस्सेआ

तोआई इस प्रतियोगिता च हिस्सा लैरदी इक खड्दारन ने अपने बचार सांझे करदे होई आखेआ.

<><><><><><>

Weather

जम्मू-कश्मीर दे बक्ख-बक्ख इलाकें च हलके कोला दरमेयाने दर्जे दी बरखा ते किश उप्परलिए धारें पर बर्फबारी दे बाद मकामी मौसम विभाग नै अज्ज कोला लेइयै 16 नवम्बर तोड़ी लगभग पूरे जम्मू-कश्मीर च मौसम आम तौरा पर खुश्क रौहने दी पेशगोई कीती ऐ। आकाशवाणी दे

जम्मू संवाददाता नै दस्सेया ऐ जे अज्ज कोला लेइयै 19 नवम्बर तोड़ी मौसम आम तौरा पर खुशक रौहने दी भविक्खवाणी मगरा केन्द्र शास्त प्रदेश दे करसानें दना राहत महसूस कीती ऐ कीजे हून उनेंगी फसलें दी बाहड्डी ते होरनें कम्में गी लेइयै कोई चिंता नैई ऐ ते ओ अपनियां गतिविधियां जारी रखी सकदे न। मौसम विभाग नै 17 ते 18 तरीक गी मौसम इक बारी परतियै बदलोखड़ा रौहने दे आसार दस्से न पर कुसे भारी बरखा जा बर्फबारी दी कोई संभावना नैई ऐ।

<><><><><><>